

La fabrica

Garrigon, Massenet,
De Tolosa arribèron.
Garrigon, Massenet,
Montèron de martinets
Los tres fraires Talabòt
L'usina l'espandiguèron
Los tres fraires Talabòt
Aital la vila nasquèt.

E dins la fabrica,
Tot Sant-juèri pica,
Truca, calfa, cola,
'stira, farga, trempa,
Talha, raspa, lima...

Balha d'aiga, òu gafet!
Vira vira, truca truca,
Balha d'aiga, òu gafet,
Truca truca, martinets.
Vai calfar, estirar,
Aqela dalha canalha!
Vai calfar, estirar,
Lo fial caldrà l'asugar.

A mecanica sarrada,
Del Fraisse davalavon,
A mecanica sarrada,
Los vasons de mineral.
Dins la gola del fornèl
Tot bolis e tot se mèscla
Dins la gola del fornèl
Nais un fuòc qu'es subrebèl!

A l'usina, a l'ostal,
A la man o la maquina
A l'usina, a l'ostal
Las limas trapan lor talh.
Plan fargadas, plan talhadas,
Plan trempadas, embaladas,
Plan fargadas, plan talhadas
Partiran pertot ont cal.

La turbina vira vira
La dinamò n'a plen l'ase!
La turbina vira vira
Caldrà calfar lo Martin
Ambe lo lum de l'usina
Las carrièiras s'esclairèron
Ambe lo lum de l'usina
Lo sègle vint s'estrenèt.